

lis Gnovis

■ **PARTEULIS.** Un an sot dal tor di Aquilee

Ancje chest an cu ven, il Lunari «l pais sot al tor di Aquilee» al contarà ogni mès, mediant di storis e d'imagjinis, la vite sempliç des personis ch'a vivin tes vilis ch'a cerclin la basilice patriarçjâl. Lopare e je stade

presentade di Ferruccio Tassin, ai 3 di Dicembar, li de sale «Achille Grandi» des «Acli» di Parteuils. Su la cuvierte, al ven onorat monsignôr Pieri Cocolin, natif di Sacilet di Rude (1920-1982), arcivescul di Gurize dal 1967 al 1982. Al fo lui ch'al concedè l'«imprimatur» pal prin Messâl roman voltât par furlan.

■ **PUART.** Rassegne botaniche narrative

La presentazion dal libri di Massimo Cuomo «Piccola osteria senza parole, ai 9 di Dicembar, e siere la rassegne «Fotosintesi letterarie», dulà che i autôrs a àn contât i siei romançs mediant dal teritori e des plantis che ju àn ispirâts. Cun Cuomo, i protagoniscj de manifestazion, inmaneade di «AlberiAmo», a son stâts Lidia Giusso («Tota e il segreto della laguna»), Filippo Baracchi e Cecilia Irene Massaggia («Maledetta zappa / Due millennial prestati all'agricoltura»). Lis presentazions a son stadis programadis li dal «Spazio Arte Bejaflora», a Puart (a 20.45).

■ **TRENT.** Dominis coletifs a scuele

Su la plateforme de Universitât di Trent, UniTrento (https://unitn.zoom.us/meeting/register/tZIsf-mqQ7wuGt1wYsuowkIaYADcJR8SL_LI), si pues dâsi in note pe lezion «on line» ch'è scree l'anade gnovè da la «Cattedra delle Proprietà collettive», inmaneade dal «Centri studi e documentazion sui Demanis civics e su lis Proprietà coletivis» pe formazion dai aministradôrs di Dominis coletifs talians. L'economist trentin Geremia Gios, vinar ai 9 di Dicembar a 17, al guidarà la riflession su lis «Condizions necessariis par vè Dominis coletifs vitâi». Tal lûc internet dal Centri, si po tornâ a viodi ançe lis lezioni di an passât (<https://sites.google.com/unitn.it/proprietacollettive/cattedra/incontri>).

■ **PESARIIS.** Il len ch'al sune

Li dal cine parochiâl di Tumieç, «David», ai 25 di Novembar, al à stât presentât il projet «Dalla



qualificazione del legno di risonanza, attraverso lo sviluppo di una metodologia innovativa basata su un approccio misuristico, alla valorizzazione e promozione del bosco certificato Pefc che quel legno ha prodotto», ch'al smire di svilupâ un sisteme par determinâ tal bosc i peçs bogns pe produzion dal legnam «di risonanza», al ven a stâi util pe produzion di struments musicâi. Il projet, presentât tal curmetraç «Suono del legno», al è curât de Aministrazion frazionâl di Pesariis, cul jutori dal fotograf Adriano Maffei, dal inzegnir electronic Antonio Selmo, di «Audio Classica» di Filippo Lanteri, dal semiolic Cesare Coppari, di «E-Laser», di «Fratelli Leita» di Michele e di Alessandro Leita, di «SaDiLegno» di Samuele Giacometti e dal dotôr forestâl Verio Solari.

Miercus 7 S. Ambrôs vescul

Joibe 8 La Madone Imaculade

Vinars 9 S. Sîr vescul

Sabide 10 La Madone di Laurêt

Domenie 11 III Domenie di Avent

Lunis 12 La Madone di Guadalupe

Martars 13 S. Luzie martare

Il timp Zornadis fredis



Il soreli
Ai 7 al jeve aes 7.35
e al va a mont aes 16.22.



La lune
Ai 8 Lune plene.

Il proverbi
Cuant che ognidun al à il so, il diaul nol à nuie.
Lis voris dal mès
Tal zardin, al è il moment di preparâ lis taleis di forszie e maruscli. Protezêt dal soreli di Invier lis rosis cun ramaçs secs.

Usurpadôrs pericolôs

*I dirits di ûs civic
a implichin
une Proprietât coletive*

«**U**ne volte, i usurpadôrs dai Bens coletifs a jerin privâts ingorts e siôrs prepotents, in zornade di vuè, i usurpadôrs plui pericolôs a son i Comuns». Al ripet dispès cheste denunzie il president dal «Centri studi e documentazion sui Demanis civics e su lis Proprietà coletivis» di Trent, Pietro Nervi, cuant ch'al çacare di chel «altri mût di possedi» ch'al resist, vivarôs e origjinâl, a la barbe di mil tentatifs di licuidazion.

Che i tentatifs no son cessâts nancje dopo che, vie pal 2017, il Parlament al à votât la prime leç republicane di riforme dal setôr – la leç 168 –, garantint un ricognossiment plen a di chei ch'a son stâts batiâts «Dominis coletivis», cul intindiment di cancelâ la confusie causionade dal tiermin «Usi civics», ch'al caracterizave la normative fassiste dal 1927 – leç numar 1766 –, restade in vore fint cinc agns indaûr, cun ducj i siei fins «auschwitzians» (seont la crude definizion dal president de Cort costituzionâl, Paolo Grossi condum).

Magari cussì no, intindiments «auschwitzians» a continuin a jessi registrâts ançe ator pe Furlanie e l'ete des vueris dai Comuns cuintri des sôs Comunitâts – che tai ultins agns a àn vût i siei fronts plui cjalts tai teritoris di Budoie, di Cosean, di Cjavaç, di Darte, di Davâr, di Davian, di For Disot, di For di Voltri, di Maran, di Ravasclêt, di Sudri e di Zui – no je afat finide. Cul «Comissari regionâl pai Ûs civics» protagonist di voltolons ch'a àn penalizât sore il dut chês Comunitâts che la sò istituzion e varès impen di pupilâ, in convigne cu la Region, tal càs di «conflits d'interès» fra Vicins e Frazioniscj, di une bande, e Comun e privâts, di ch'è altre.

Il càs plui clamorôs al rivuarde juste a pont la difusion dai «Ûs civics» tal teri-



La benedizion dai prods dai Bens coletifs, intant de «Fieste dai Bens comugnâi» di Muçane dal 2017

A cressin
lis Comunitâts
ch'a domandin
un'aplicazion
plene
de Leç 168/2017

tori de Patrie. Une sglavinade di parês dal Comissari e dai Uffics regionâi za timp a sclarivin che «i terreni di uso civico, appartengono alla collettività degli utenti e costituiscono una proprietà collettiva» (spie par un esempli: la Note prot. n. 1486/94 - Pos. UID 125 dai 21 di Novembar dal 1994; ma ançe lis Notis R. C. n. 3/2000 Pos. Ud 125 dai 2 di Març dal 2000 e prot. n. 506 UC/2002 Pos. UID 125 dai 16 di Setembar dal 2002), cu la precisazion che, tal càs furlan, no si trate di «diritti parziali o di limitate utilità su beni di proprietà comunale, ma di una proprietà collettiva in cui tutte le utilità sono della collettività», cemût che ai 26 di Jugn dal 2007 e ribateve la Direzion regionâl pes Autonomiis locâls (Note prot. n. 10437/1.9.60), confermant une linie za marcade te Note dal prin di Avost dal 2002, ancjemò plui sclete: «Nella nostra regione, i diritti di uso civico, più che consistere in parziali utilità su terreni privati, implicano una vera e propria proprietà collettiva». Ma cheste linie e je stade contraddite te pratiche, ogni volte che lis Comunitâts proprietariis dai Bens coletifs a àn domandât di aministrâju par so cont, cui sindicis, i assessôrs e i funzionaris regionâi impegnâts a rivendicâ «proprietà comunâls» mai dimostradis e «diritti parziali esercitati su terreni alieni» che no àn nuie ce fâ cu la storie regionâl.

Tal setôr dai «Dominis coletifs», parâltri, al vâl il principi de «Presunzion di demanialità», ch'al è ben precisât tunc sentenze dal Comissari dai Ûs civics di Vignesie dai 30 di Avrîl dal 1971: «È principio consolidato che nell'ipotesi in cui un Comune non provi la patrimonialità dei terreni ad esso allibrati per via di regolare acquisto da esso fattone, ovvero in seguito a lasciti e cessioni a titolo patrimoniale, che ne dimostrino la provenienza, i terreni medesimi, per la presunzione di demanialità civica, inerenti ai terreni comunali o frazionali di antico possesso e di ignota origine, debbano essere considerati di demanio civico» (cemût ch'è a confermât la sentenza n. 20 de Sezion Ûs civics da la Cort di Apel di Rome, ai 16 di Mai dal 2013).

Mario Zili

A Udin, la Messe par furlan

A Udin, la Messe par furlan e ven cjantade sabide ai 10 di Dicembar a 5 e mieze soresere, li de capele «de Purità», dapruf dal domo (cun Radio Spazio che le trasmet sul moment). E compagnarà la celebrazion la Corâl di Segnâ. Al cjantarà messe pre D. Volpe.

Tradizions furlanis dal mès par cure di Mario Martinis

SANT NICOLAU

Il cult di Sant Nicolau, protetôr dai fruts, al cjatà une grande difusion in dute Europe par vie dai tancj miracui e des maraveis che la agiografie cristiane i assegnâ. La sò devozion si disvilupà dal secul Sest prime in Orient e po, tor dal secul diesim prin, ançe in Ocident, li che la fieste dal sant e je stade fissade ai 6 di dicembar. Cul cori dal timp, il sant che al scree il periodi dal solstizi a un mès just de sò conclusion te Epifanie, al à metût adun te sò tradizion ançe antighis mitologiis nordichis che a vevin come fonde la lote dal ben cuintri il mâl. Cussì, in chest periodi precis dal calendari li che plui fuarte e je la bataie tra la lûs e il scûr pal svicinâsi dal solstizi, Sant Nicolau al dome il diaul o i diaui te lôr forme di demonis de nature e de vegetazion, vierzint il «cicli dramatic» dal solstizi



di unvier, domicili dal contrast jenfri lis fuarcis alternadis che a rezin l'univers e che a guvernin il ritmi de nature e la ruède dal timp. Ancje se la tradizion e parten a ducj i pais de Europe centrâl, tal Friûl setentrionâl (Valcjanâl fin a Pontebe e Timau te Cjargne) ai 6 di dicembar ancjemò in di di vuè si tegnin lis primis mascaradis dal solstizi cu la jessude di Sant Nicolau, rappresentât di un vescul cun mitrie e pastorâl, in compagne dal Krampus, sorte di demoni-cjavron o spirt des monts, par solit seguît di une schirie di canais vistûts di diauluts. In Friûl, a Triest, in Istrie, a Flum, tal Cuarnâr e te cengle prealpine di soreli jevât, S. Nicolau al da fûr regâi ai frutins, emblemis de vitalità biologjiche e dal rinovament, come che daspò a fasaran Sante Luzie, papà Nadâl e la Befane.